


الهيئة العامة لقصور الثقافة
إقليم القناة وسيناء الثقافي
ثقافة شمال سيناء

إبداعات أدبية
تصدر عن ثقافة شمال سيناء



مجلة علمي ضد الفقر



شعر

مروة فتحي محمد

أهداء

إلى أبي
إلى أمي وأبنائي
إلى أختي وزوجتي
إلى كل من أحببت
وكل ما أحببت

أهدى هذا الديوان

حسونة فتحي محمد

مقدمة

حسونة فتحي ، شاعر من أرض القمر والفيروز ، يأتينا ديوانه الأول " نجمة علي خد القمر " فيمطرنا بعبق التراث ونكهة الطبيعة الساحرة.

وهو يسير بنا في رحلة شعرية علي ظهر زورقه الشعري الحالم فتراه يتوقف بنا عند محطات الحب والحنان ، والأمل والألم ، والنشيد والنشيج ، وهو يصيح في عالم الصمت ويخبو في ضوء القمر ثم لا يلبث أن يخرج لنا مع طلعة كل شمس بقصيدة جديدة يقطرها بدمه وعرقه وروحه ويمزجها بالورود والرياحين ويعطرها بالمسك والياسمين فتأتينا مشتعلة بجمر النار وبوهج النور ، إنه يخرج إلينا كل صباح مع الدخان والنسيم فيمطرنا بالنور والنار.

إن ديوان نجمة علي خد القمر هو جذوة من اشتعال الوجد وتمازجه بالورد والود والأمل في عصر خبا فيه نجم شعر العامية الجميل ، فيطالعا بلغته الرقيقة الشفافة التي يمزج فيها الأحزان اليومية بالمواجد ، ويمزج الواقع بالحلم فيخرج لنا لؤلؤات تنقطر نوراً من محراب معبد الشعر الجميل.

وهذا الشاعر يذكرنا برواد شعراء العامية الكبار : بيرم التونسي

حكم القدر

لو مرة غاب القمر
أرسم بأيدك ضي
وان فات زمانك هدر
أحرص على اللي جاى
والقلب لو يوم قسي
الحرف قلبه ني
وارضى بحكم القدر
وارمى الحمول ع الحي .

نبض أول حب

لأنك ؛

عشت ويايا سنين عمري اللي من قبلك

لأنني ؛

عمري ما نسينك ..

ولا نسيت اللي كان قبلك .

لأنني ؛

مش راح أنكر يوم ..

بأنني عشقت من قبلك ..

وإني عشقت من بعدك ..

وإني

عمري ما خنتك .

ولا اتحملت طول بعدك

لأنك وعد جوابا

عرفتك

قبل ما أقابلك !

رسمتك ؛
جوّه ركن القلب ورداية.
كتبتك
وسط أول سطر همزاية.
حفظتك ؛
تحت رمش العين.
وصفتك ؛
نهر بين شطين.
وعشت سنين ؛
أنور كهف موالى ..
بسهراية.
ضياها من سنا قلبك.
وأحلم بك
وأنا صاحى.
لضمت ف عقد أفراحي ؛
هموم عازف.
وأنا جراحي ؛

كما بحار ؛
ودقة مركبه تايهة،
ما بين الموج ..
بتتحادف.
نصادف في طريقنا قلوب
ونتخالف.
وويا قلوب ؛
بنتآلف.
ونتلاطف .. ونترادف
يدق القلب ويا القلب
ونسرع نبض أول حب
يلون شوق خطاونا ؛
بلون الزهر
يفوت العمر ؛
وقلوبنا براح للحب.
يموت الكره جوانا ؛
ونلقانا

رَجَعْنَا نَحْبَ مِنْ تَانِي.

وَبَيْنَ الْحَبِّ ..

وَالْتَانِي

نَعَانِي

نَبِضَ أَكْبَرَ حَبِّ.

حدوتة

وترجع بينا أيامنا
لطفلة حلمنا الوردي
ونسبق عمر أحلامنا
يجيبنا شوقنا .. ويودى
لأيام لما كنا صغار ..
وكنا نجتمع في الدار
وكانت جدتي ؛
تحكى حكاويها ..
اللي ماليها كلام الفرح
والمواويل
عن " الشاطر وست الحسن "
وعن بطولات وعن أمجاد.
و " على بابا " ..
وقصة " سندباد " مع القنديل.
وقصة " لص من بغداد " ..

بیسرق لثمتہ ویرضی

بأقل قليل

وكانت تبتدى القصة

تقول :

" صلوا على طه "

تفيض الفكرة جواها .

تاخذنا القلب " حدوته "

يتوه العقل وياها

لحد ما تنتهي " بتوته "

حلو ولا ملتوتة ؟!

نقول : حلوه

ونجرى ؛

لحضن أحلامنا.

ننام ..

وف حلمنا تشرق بداية

القصة من تاتى.

أدور فيها ؛

ألقاني .. أنا " الفارس " ..
وأنا اللي باصنع الأمجاد.
وألقى بداية القصة ، وبداية الحلم ..
من " بغداد " !!
ونصبح تاتى يوم نلقى القصص
تتعاد وتتجدد
ونلقى صوتها يتردد
في أحلامنا ..
في عقد الحلم يلضمنا ..
أمل بـ كـره .
وتبدأ .. قصة الفكرة .. لحد الصبح ما
يظهر ويجرى عمرنا ونكبر ؛
ونتعلم .
ونقرأ تاريخنا ونسلم ؛ بأن المسألة اكبر
من الحاكم. أو المظلوم ..

أو الظالم.
ألقى تاريخ يقول :
جدي في جهل الدنيا ..
كان عالم.
في عهد الظلم ..
كان عادل
في عهد الرق ..
كان حاكم !
وأنا بس اللي مش فاهم؟
وباسأل :
هو أنا المظلوم ؟ أو الظالم ؟!
يطوّفتي .. أمل واهم.
بأن تاريخي مش حيخون.
وإن الصعب بكره يهون.
ويرجعني زمام الكون ؛
وأرجع أصنع الأمجاد كما جدي؛
اللي كان يوصل بلاده ..

"صبحها وليلها"
وكان يغزل أوصلها :
من "الكوفة"
وم "الموصل"
ومن "بغداد" !
أتارى المسألة ..
"بغداد" !!
وهى مهد حضونتي
وهى تاريخي وحضارتي
وهى
بداية لحكايتي مع الحكم ..
ومع الحكمة
مع العلم ..
ومع العدل
ومع العصمة
ومع العزه
اللي بيها أصبحت غاية !

وقصة فكرة ورواية ..
نسجها في الخفي ملعون ؛
وحرباية ..
وفاضل " فصل " و " نهاية "
عشان يرسم تاريخ الكون
بصورة ؛
عمرها ما تكون ..
كما بنحلم
لحد ما ييجى يوم نفهم
بأن المسألة اكبر من الظالم ؛
أو المحكوم
أو الحاكم ٥

طيف

لما كان الشوق يأخذني
قبل طيفك ما يواعدني
كنت أروح البحر أسأل
التقيه بالشوق يزيديني
كنت أحلم بيكي موجة
تغسلني دمعني وآهاتي
كنت أحلم إنك أنت طوق نجاتي
كنت احب الشط لمحة من جفونك
كنت احب البحر يرسم
زرقته من لون عيونك
كنت أشوفك
نجمه فوق خد القمر
فوق جبين البحر ترسم
ضيها ف ليل السمر
يندهوا العشاق لقلبي

يسألوني
يلتقوا في عيني صورتك
يعذروني
يستهجوا الحب كلمة
من شفائي
يقرأوا اسمك من حروفي
ومن سكوني
يترسم في القلب طيف
يشبه خيالك
يتنسج في الأمل
بخيوط وصالك
أبقى مالك دنيتي
وآخره ظنوني.

المفترق

مقسوم لنا ؛
نسبى خطاوى عمرنا
وف كل خطوة يتسرق منا ..
فتافيت حلمنا.
وكأننا ؛
أصبحنا عايشين ع الورق
اللي نطق ..
بحروف آلامنا وفرحنا
ويلمنا ؛
صوت الشجن
اللي أتسجن في قلبنا.
مع إننا ؛
طول عمرنا ؛
الفرح ما لي حلمنا.
مكتوب لنا ؛

الليل يبات في حضننا.
يرمى همومه ..
في همنا.
ويشدنا ؛
ضى القمر ..
أو صوت تسابيح المطر
أو قلب خان ؛
أو قلب م الظلم انكسر
نسمع آهاته ف قلبنا
وكأننا ؛
كل البشر !
وشاء القدر ؛
إنه يجمع شملنا.
ويضمنا ؛
في حلم واحد كلنا.
يرسم لنا ..
ضى الطريق

زي الصديق اللي يواسى وقت ضيق ..
ويدلنا.

يشتاق لنا ؛

حضان الورق

نتلاقى في حضان السهر

يفرد لنا

جناح السفر

نوصل لحد المفترق ..

ونتووه ؛

ونرجع نلتقي ..

في حلمنا.

بأحلفك

بأحلفك ؛
يمين الحق.
و أقول: لو تطلبي عيني ..
بأني مش حاقول لك لأ.
و أقولك:
يا منى عيني ..
تتأدى تسمعك ..
عيني
وقلبي ؛
اللي بحبك دق.
أطوف أسبق ضيا النجمة ؛
تلاقيني ..
على بابك.
أظهر روحي ..
في رحابك.

وأحضن ..
كل أحبابك.
وأفرح لو ألاقيني في آخر
صف خطابك.
وأقل كثير ؛
حيسعدنى
وأكون حاسس بأن الكون على حبك
بيحسدنى
لأن ما فيش هوى عنك ..
حيبعدنى.
ومهما أقاسي في حبك أقول :
يا رب زودني بـ
وأتمنى ؛
يكون الموت في أحضانتك ..
مواعدنى
يا "سينا" ..
أرض "مصر" أنتِ ..

وأرض أبويا وأجدادي ؛
وأرض أولادي وأحفادي
حاثت فيكي أوتادي
وأفرش رملتك .. ضله
وأخذ مذهبك مله ؛
وتبقى ميتي وزادي .
وفي أفراحي وسهادي ؛
أغنيك
واسهر ليل مواويلك
أقول :
يا "مصر" يا غالية يا فاكرائي
في ترتيلك
دي "سينا" وافقة بتنادي
على زهرة شباب جيلك
تقول : يا اعز أحبابي ؛
أنا فاتحه لكم بابي
تعالوا لحضني ..

ضموني ؛
تشوفوا دفء ترحابي
تكونوا لمة أحبابي
أنا روح الشهيد مهري
ودمه ؛
حنة في كعابي
وكان من كل بيت مصري ؛
بطل واقف على أعتابي
يعاتب نفسه في أمري
حلف : لازم يجيب مهري
يحرر غربتي وأسرى
أنا يا " مصر " يا أمي ؛
عانيت من غربتي وأسرى
أنا يا " مصر " يا أمي ؛
زرعت آمالي جوارها
سقيتها ؛
من عيون دمي

حميتها ؛

من عفار همي

داريتها ألف ومتين شهر

من " أيام القنّاة والحفر "

وسطوة " الإجليز " والأسر

وحكم " العسكري " والقهر

و " صهيون " اللي خدني غدر

ده أنا طال الأسى بيّ

وعلمي المدارية

وعودني الأمل والصبر

لحين ما يهل يوم النصر ؛

لحين ما النصر تتبدد بنوره

كل أحزانك

لحين ما الفرح يتجدد ويملى

كل ألماتك

أغنيلك ، واسهر ليل مواويلك

أقول : يا " مصر " يا غالية

بملاحك ورباتك
حفظتى كرامتك الغالية
بإصرارك وإيمانك
ورجعت أرضك الحرة
تضميها في أحضانك
ورجعت ضحكك زاهية تفرح
كل خللك
وأغنيك ؛
وأشكيك ؛
أقول : يا " مصر " يا أمي
أنا مشتاقة للفرحة
وطالعة من تراب همي
ولابسة توبي والطرحه ؛
" لفارس " ؛
يبقى من دمي
يكونوا أهلي خلله
وأحس بأنه رايدنى وإنى

مالیه وجدانه

وأحس بصدق إيمانه.

وأنا ؛

يا غالية باحلفك على لساني وعلى لسانه

بأنّي .. مش حاقول لك : لأ

وأقول لك : يا منى عيني

تنادى .. تسمعك عيني

وقلبي ؛ اللي بحبك دق.

سوق الثلاثاء

سكت الكلام ؛
والدمعة نزلت م القلم .
رسمت على ورق التاريخ ؛
صورة هرم
مقفول على صوت المشاعر ،
مفاتيح خزائنه ويا شاعر ؛
غنوته .. بسمه ألم .
قفل التاريخ ورقه ..
على صوت المشاعر .
سكتت ؛
وبسمه غنوتك فضلت يا شاعر ؛
بسمه بلا صوت !
فضلت تلف الكون ، تفوت ؛
على بيان كل البيوت
جّوه المداين والكفور ؛

رسمت في قلب الضلمه نور .
زرعت أمل في أرض بور .
شققت شباك العنكبوت ؛
فاتت على كل البيوت
لكنها وقفت ؛
على أبواب القصور !
إياك في يوم ؛
تبني مدينة للقصور .
إياك تعيش يوم في الجور .
الذل لما يوصلك ؛
يهدم وراه كل الجور .
الذل لو يوم تقبله ؛
يفضل تاريخك يركمك .
أوعى المخاوف تهزمك !
خلي كرامتك تحزمك ؛
خلي التاريخ في أحلى صورة
يرسمك

آه لو تقوللى يا وطن ؛
إيه يلمك ؟!
مين قسّمك ؟!
كتر الأكم حيعلمك ،
وطن العرب للخلف ساير مركبك ؛
مجرور وناسي منصبك !
مين اللي يقدر يرفعك ؟
أو ينصبك ؟
من أمّتي
كان سيف الأعداي بيرعبك ؟
بعد أما كان ..
صوت المدافع يطربك !
عارف عدوك بس سايبه يغلبك
آه يا وطن !!
يا مين يلمك م الشتات ؟!
مهموم .. ومليان بالآهات ؛
مهمزوم .. وراضى بالفتات ؛

تاهت ملاحك !!
في دروب "سوق التلات" .
"سوق التلات" ؛
محكوم بأيدي المفتري
"سوق التلات" ؛
لازم تبيع أو تشتري .
وأنت اللي تدفع لو تبيع
ومن سكات !
وأنت اللي تدفع لو تكون المشتري .
"سوق التلات" ؛
فيه أم بتبيع بنتها ،
فيه بنت بتبيع عرضها ،
فيه اللي محكوم ؛
واللي حاكمة بأمرها .
فيه الأغاتي والصاجات .
"سوق التلات" ؟
ما فيهموش عقارب للساعات

إنما تعابین بتلدغ

من سكات

تعابین وقبل ما تلدغك؛

بتدغدغك؛

وتضحكك ؛

وتفرحك ؛

علشان تغير ملمحك .

وتكممك وتسممك ؛

علشان ما تقدر ترسمك

صورة هرم

مقفول على صوت المشاعر

مفاتيح خزانیه ویا شاعر ؛

غنوته؛

بسمه ألم.

قصيدة

نظرة عيونك ؛
مشنقة .
همسة شفائيك ؛
زفرقة .
لمسة إيديكي .. ضحكك .
الصبح ؛ يشبه طلعتك .
والليل ؛ يغير من قُصتك .
فتشت عنى ف قصتك
لاقيتني كلمة مخدقة .
مشتاق لساعات اللقاء
بيكى يا غالية يا طيبة .
يا مطيبة جرح السنين .
يا عايشة جوايا جنين .
لحظة ميلادك
عشتها

لحظة ميلادك عمري يوم ما

حسبتها

أو سبتها

عمرك .. ما هواش بالسنين ،

يا أم عاشت عمرها ؛

في قلبها.

قلبك ما هواش عالشمال ؛

أو عاليمين ؛

يا قلب عمره ما اتجرح

مع إنه مليون بالأسى ؛

أو بالفرح.

لما كلامك ينشرح

أو لما صدرك ينشرح

يا فرحة تيجي في وقتها

يا دمة باعشق حضنها

يا شمس فاردة ضلها؛

ومدفية ليل المطر

يا نجمة ؛
أجمل م القمر.
يا غنوة من عهد الصبا.
يا همسة في ليل الصبا.
يا نسمة صافية .. طيبة
يا كلمة في ليل السكات
يا وصف ؛
أجمل م الصفات
يا جملة حلوة عشقتها.
ونقشتها من كلمة كلمة ؛
وحرف حرف.
ووزنتها .. وحفظتها و قرئتها بدل المرة
ألف.

بننت مصر

أجمل ما في الكون بلادي ؛
بكل ما فيها .
بأهلها ورملةا
وجبالها وواديها .
ببحرها و سحرها
ويطهر أراضيها
بابنها البطل اللي بروحه ؛
يفديها لي
بكلمة : " الله أكبر " ؛
تملا أركانها ؛
المولى صاتها في حاضرها وماضيها .
والماضي هو التاريخ ؛
للأرض وأولادها .
وأرضك يا " سينا " تنادي ؛
نسمع الندهة .

تقول : أنا بنت " مصر " ؛
وأم لكل أولادها.
أنا: أم حاصنة ؛
لشهدا صنعوا أمجادها
أنا: غنوة حلوة ؛
بتبهج كل أعيادها.
وأنا: المصلى ؛
لكل العابدين فيها.
أنا: بنت " مصر " التي
ذكرني "المولى" في كتابه.
أنا: معبد الطهر التي كلم
" موسى " في رحابه.
أنا: مدخل النور التي "عيسى" مر من بابه.
أنا: بنت " التي غزاتي كلهم خابوا.
من عهد " أحسن " ؛

" للسادات " ؛

" لمبارك " ؛

الكل شارك في ذلك حصون أعادتها.

أنا: بنت " مصر "

الحضارة ؛ والتاريخ والنصر

وأكتوبر اللي حكى عنه الزمان ، والعصر.

أنا تحت رملي غزاه ؛

ما لهم عدد ولا حصر.

وف حضني نايـم شهيد

من كل بيت في مصر.

٢٥ سنة ؛

وأنا لابسـة توب النصر

وحافظة الحكاية

وطول العمر حاجكيها.

لمحظة دفا

حسيت في يوم .. بالدفا !

قلت : أرسيك موال.

أو غنوة منشوقة

أو صورة

أو تمثال

تاھت حروف كلمتي !

وما لقيت كلام يتقال.

لا عدت متسمسة ؛

والحال ما عادش الحال

وبالرغم من كل دة ؛

لساك شاغلة البال.

آخر الطريق

ومشيت ؛

على نفس الطريق ،

اللي بيعشق خطوتي

واللهفة في قلبي البريء

وف حضني ؛ شايل فرحتي.

ومشيت ؛

على نفس الطريق ..

مشتاق لضمه حضنها.

مشتاق لدقة قلبها ،

اللي بتحكي قصتي :

م " المبتدى للمنتهى " .

كنت ألقى ضحكة فرحتي ؛

على سنها.

كنت ألقى حرقه دمعتي ؛

على خدها.
كنت ألقى نفسي في قلبها.
والكلمة لما تمسني ؛
بتهزها.
ومشيت ؛
على نفس الطريق ؛
ما بين آلاف الذكريات ..
ما بين .. " حدود الأسئلة "
وبين .. " براح المسألة "
ويا تفاصيل اللي فات ؛
من " فرحتي بالمريلة "
لحد " آخر مرحلة "
بالأمثلة ، كانت تحل المعضلة
وكل كلمة بالحساب والمنقلة.
وبكفها : تمسح جراح النهنهة
ومن صبرها : تسقيني كاس المرحلة

وف حضنها :

عمري ما حسيت إنها

الحاجة " غالية " ؛

" عمتي "

واشعر باتي جوه أحضان والدتي

اللي ما فيش حد أغلى منى عندها .

كان نفسها

تغسل ضلوعي م الهموم.

وتشوفني يوم ؛

أحسن من الناس كلها

ومشيت ؛

ما بين آلاف الذكريات

ووصلت لنهاية الطريق ؛

لحد سور بيتها العتيق

ووقفت ؛ ماليني السكات

والقلب ينطق أسمها

أتارينى ناسي إنها ؛

راحت لمسكنها الجديد
اللي طريقه مش بعيد ،
ومشيت طريق ؛
غير الطريق
طريق؛
لا يعرف خطوتي
ولا مرة صادف فرحتي
ولا يعرف إني جاى زيارة "
لعمتي "
في قبرها.

للخلف دووور

للخلف دور ؛
الخط الأحمر تحت رجلين
كلمتك .
إرجع ؛
لحد أما تلاقى نقطتين ؛
" فوق بعضهم " .
ما تقولوش : عيب !
همّ كده طول عمرهم .
من بعدهم ؛
تلقى أوامر سكتك .
إيه سكتك ؟!
لما النوايب فتحت قلب الضمير ؟!
وسكتك ؟
للخلف دوور ؛
رايح لفين ؟

مش شغلتك ؛
تنبش آهات جرح السنين .
إثـمـك مـبـيـن ؛
لو خضنت في غير المباح
رتب حروفك من جديد
إياك تحيد !
وارسم فواصلك من حديد
وأملئ سطورك ؛ ...
بالنقط
رح تتبسط ؛
كل أما تمدح أو تشيد
خليك وسط ؛
تبقاش عنيد ؛
وافهم دهاليز الأمور
للخلف دووور .

باجبك

باجبك ؛
بس مش عارف أقولها ؛
ولا أداريها ؟!
و أخاف لو قلتها تقسي
تصديني
وأروح فيها !!
باجبك ؛
قلب يجمعنا ونسمع دقته فينا
منايا : الود يجمعنا ؛
وتتحقق أمانينا.
باجبك فجر أيامي ؛
وقمر الليل في موالى
وطيفك وحي إلهامي
وأحلامي .. وترحالي
باجبك ؛

وأنت ظالماتي ومين ينصفني

من بعدك ؟

وهاجراني .. ونسياني

وأنا ما أقدر على بعدك

باحبك ، بس لو مرة تولي

أن أنت رايداني

توريني حنان قلبك

يا قلبي .. وروحي .. وكياني

باحبك ؛

حب ما يقدر على وصفه

قلم ولسان.

وهورتك بين سطوري " قلب "

يملاها دفا وحنان

باحبك ، ضل نخلاية

في ساعة الحر يؤيني

واحبك لما اشيل حملك

علي حملي ... يقويني

بأحبك قشة الغرقان
بأحبك دفوة البردان
بأحبك وحي للفنان
يا ست الكل يا بلادي .

مش عايزكوا تقولوا شاعر

مش عايزكوا تقولوا : شاعر !

شغلته صنع القوافي ؛

وهو حافي

حتى أسمه جديد علينا !

وكتاباتاه

زي غيره ؛

لحمها من خير دموعنا ؛

وخير مذللتنا وخضوعنا

دا اللي بنعانيه يوماتي

يملا كراسة خواطر !

مش عايزكوا تقولوا : شاعر ..

جاي يفكرنا بهموننا اللي نسيناها

واللي شقت قلبنا من يوم ميلاده

لحد آخر يوم في عمره

نص ليها و نص للي يهमे أمره

اللي يطلع مين ما يطلع ؛
المهم انه حيقطع قلبنا
ويحرق رماده.
مش عايزكوا تقولوا : شاعر
جاء بيتفلسف علينا بكلمتين ؛
في القضية وفي السياسة
في السعادة وفي الهوى و الحب
والشوق والتعاسة
الكلام ده
راح زمانه
والكلام ؛
ريحة دخانه معبقة في قلوب عينينا
و " الخطابة " ليها ناسها
اللي عارفين إيه مقاسها
حتى لو لبست عباية ؛
أو صديري
أو كوفية وبدلة ميرى

أو حزام ملفوف و خنجر
أو مشجر
أو سموكن أو نياشين فوق نحاسها
يعرفوها ويعرفوا ترتيب حروفها
و فين نقطها و فين شرطها
و آيه شروطها
يعرفوا لامها وألفها ،
لما تبقى في حاجة تافهة.
يعرفهم كلمة نعم . وبيعشقوها .
مش عايزكوا تقولوا : شاعر .
قولوا : ده بيكتب كلامنا
قولوا : مش راضى بحطامنا
وبأثامنا
بابتسامتنا وآلامنا ؛
وبحروبنا وبسلامنا.
قولوا : ما يخطر ببالك
وخلوا بالك !

أوعوا مرة تسمعولوا
ولا تقرؤا أي كلمه من كلامه
ولا تعجبكم نصيحته
واعرفوا الأول حكايته
أصله كان إنسان جرئ
شايل لجامه
كان في عز المعصية.
يرمى كلامه
ولو عرفتموا الباقي ..
تبقوا تحكوهولي.

المهمة

كل العقول تايهة في حبك
والقلوب منحطمة
ولوحد قالك باعشقتك قدي
حافول ده ربما
لكنما عشقي أنا زي الشجر
الجنر جوه القلب ؛
والفروع فوق .. في السما
وكلامي يملأه الخضار
لما تكوني المهمة .

الهوى

صعبان على الهوى
م اللي بيجراله
لا قبلنا فهموه
ولا عرفوا إيه ماله
ومع إتنا فهمناه
.. نكرنا أفضاله !
وبكره راح ينسوه
ويدعوا .. لإهماله.

يا وحشاني

واربت الباب وأنا داخل
وقلت : الله يمسيكي بنور الهادي
يا حاجة
وقبلت الإيدين والرأس
وضمتني
وضمة قلبها أدفى من الحب
اللي متوزع ما بين الناس
قعدت ؛ وفرحتي تجرى وتتقطط
على اكتافى
ودقة قلبها الصافي ؛
تطبطني على ظهري ؛
تهديني ؛
توديني لدنيا مش في دنيتنا
وريحة المسك بتسرسب
في أنفاسي

يا ريت عندي نفس تاني ؛
واسيب الريحه تملاني ... وتملاني
وتملاني
ساعتها ؛ وافتكرت الباب
نسيت أن كنت سيّته موارب
ولا سكيته !
ياريتنى أكون سيّته ..
ويجوا أخواتي من بعدى
وربحه المسك والغبر تروح
تملا هوا الدنيا.
وحتى لو إني سكيته أكيد
رح يتفتح تاني
لأن أخواتي .. مش واحد
ولو نده الأذان ييجم
يصلّوا عند رجليها
ولما يسلموا توقف
تمد الأيد توقفهم

وتدعيلي .. وتدعليهم
تصحبهم ضمير الناس بدعواتها
في صلواتها ؛
بتتمنى ينولوا كل راحة البال
تملى يلاقوا في دروبهم
جدع طيب ؛
وأبن حلال
ببركة من دعا الوالدين ؛
يوزيهم طريقهم فين ..
وسكتهم.
يا أمي يا اللي وحشاتي
هداوة لونك الخمري ،
يا شايلة المر من صبري
وساقياتي كاسات الحب من بدري
ولو شفتيني بانتهد
ترشني الأرض و تسمى
وتقرى آية الكرسي

و تتعذب عينيكي لو سمعتي حد

يمدحني

وتلمحني عيون قلبك ولو

بيني وبينك سور

وان المقهور في ترحالي

خسرت البخس والغالي

وصوت الحزن كان مالي

ملاح عزوتي ومالي

رميت شالي على أكتاف الزمن

ومشيت

ما بين الصفحة و الصفحة

ف ضني حالي

لحد أما أتسبغ لوني

بلون الصبر

لقيتك أنت يا أمي

في آخر صفحة واقفالي

بنفحة واحدة من ريحتك

تشيلي المر من صبري
ولمسة أيدك الطاهرة ..
تطهرني .. توضحيني
تضميني ؛
كأني ابن ست شهور
وأنا البكري
يروح فكري للون الفرح ف عنيكي
ساعة ما خطوتي تتجج
ساعة ما افرح
تبوسي إيديكي وش وظهر
وتحنى الجبهة وتصلي
صلاة الشكر
وأليني
رجعت من تاتي
وريحة المسك مالياتي
وحارمي نفسي ف أحضاتك
وأعيش أجمل ساعات ممكن

يعيشها حد في الدنيا
وفات منهم يا دوب ثانية
لاقيني لسه في سريري
بافتح عيني .. ع الغربة
أكن قلقها تشخيري
وقامت واقفه صحيتني
بجزمتها
من الحلم اللي نساتي قساوتها
يا أمي ... يا اللي وحشاتي .

صورة

على القهوة اللي كانت ملتقى
للصحبة والخلان
تلتقي لمة وصحبة وأصدقاء
متجمعين على شيشة ؛
على طاولة ؛
على دومينو ؛
على شطرنج أو حتى على كلمة
على بسمه
تلاقى الخط والغلبان
تلاقى القلب مرسوم ع الوشوش
من غير رتوش
وكنت أحب الصّفح .. !
و أشوف لون الكلام في العين
وطعم الضحكة ع الشّفّة
وريحة الليل ..

تهفّيف فوق سوارى الضى
في مرة والتقيته جى !
جدع أسمر
فضل يمشى ما بين الناس
يلف القهوة لا يقعد ولا يطلب
ولا يبعد ولا يقرب
ولا حتى بيستغرب
وكان سنة في تالت عقد
ولسة الشعر بيفكر
يسطر حد للحية ،
وكان يحيا ساعات وساعات
على سجارة ورشفة شاي
يشد الخطوة ..
والشفة بترسم بسمه من غير لون ،
وكانت شهرته المجنون
حاولت اعرف حكايته إيه ؟
سايرته .. واتحايلت عليه

لحد أمّا فرد قورته
وظلّ صورة من جيبه
مسكت الصورة واتأملت !
وصلت لأنها صورته
وكان واقف على منبر !
في ركن الصورة كان باين يا دوب كلمة
بخط احمر
ما اعرفتش أن كانت حكايته مضحكة
أو مبكية ؟!
الكلمة كانت ..
أسيّة !

نفسی

- ١ -

نفسی یوم

أملك شجاعتك يا قلم
وأطلق حروفك من لساني
وان عصاتي
أقطعه
وأعلقه للرجم في أكبر ميدان
وأكتب علي صدره " جبان "
وأجعلك
أنت رسولي للكلام
وأجعله
عبره لـ ١٠٠ مليون جبان.

- ٢ -

نفسی یوم

أفرد جناح الريح

وأسبق خطوتي
وأطوي مسافات السفر
واسكن زحام الغيم
وامنع وصول الرعد
لو يكون من غير مطر.

- ٣ -

نفسي يوم
أجمع إذاعات العرب
في يوم إذاعي مشترك
من غير خطب
أو إعلانات
أو تصريحات
أو فن مختار
من نفايات الأثرب.

الفهرس

٧	حكم القدر
٨	نبض أول حب
١٢	حدوته
١٨	طيف
٢٠	المفترق
٢٣	بأحلفك
٣٠	سوق التلات
٣٥	قصيدة
٣٨	بنت مصر
٤١	لحظة دفا
٤٦	آخر الطريق
٤٨	باحبك
٥١	مش عايزكوا تقولوا شاعر
٥٥	الملهمة
٥٦	الهوى
٥٧	ياوحشاني
٦٣	صورة
٦٦	نفسى

نجمة علي خد القمر